

三輔黃圖

閩中叢書

三輔黃圖

邵力子署

三輔黃圖序

易曰上古穴居而野處後世聖人易之以宮室上棟下宇以待風雨蓋取諸大壯三代盛時未聞宮室過制秦穆公居西秦以境地多良材始大宮觀戎使由余適秦穆公示以宮觀由余曰使鬼爲之則勞神矣使人爲之則苦人矣是則穆公時秦之宮室已壯大矣惠文王初都咸陽取岐雍巨材新作宮室南臨渭北踰涇至於離宮三百復起阿房未成而亡始皇并滅六國憑藉富疆益爲驕侈殫天下財力以事營繕項羽入關燒秦宮闕三月火不滅漢高祖有天下始都長安實曰西京欲其子孫長安都於此也

長安

本秦之鄉名
高祖作都

至孝武皇帝承文景菲薄之餘恃邦國阜繁
之資土木之役倍秦越舊斤斧之聲畚鍤之勞歲月不息
蓋騁其邪心以誇天下也昔孔子作春秋築一臺新一門
必書于經謹其廢農時奪民力也今哀採秦漢以來宮殿
門闕樓觀池苑在關輔者著于篇曰三輔黃圖云東都不
與焉

三輔黃圖載西都城闕官署與凡國中建置沿革一切大略無遺可考見一代制度不可無之書也久不見刻本爲博古之學者患盱江左氏藏此蓋積有世年今江浙參政桂坡先生出示鼎使序而刻之以不爲私家藏而大人君子公天下之心亦可得而見焉使不刻行之則雖有藏之家者將日就殘蠹不可謂非一墜典也先生刻此亦所以成先世之遺志云

成化庚子三月旣望八十一翁嘉禾周鼎伯器書

三輔黃圖卷之上

陳繼儒仲醇閱

亡名氏撰

沈德先天生校

張可大觀甫校

三輔沿革

禹貢九州舜置十二牧雍其一也古豐鎬之地平王東遷

以岐豐之地賜秦襄公至孝公始都咸陽

秦孝公十二年於渭北作咸陽

徙都咸陽在九嵎山渭水北山水俱在南故名咸陽秦并

天下置內史以領關中項藉滅秦分其地為三以章邯為

雍王都廢丘

今興平縣地

司馬忻為塞王都櫟陽董翳為翟王

都高奴今延州金明縣謂之三秦漢高祖入關定三秦元年更爲

渭南郡九年罷郡復爲內史五年高帝在洛陽婁敬說曰夫秦地被山帶河四塞以爲固卒然有急百萬眾可立具因秦之故資甚美膏腴之地此所謂天府陛下入關而都之山東雖亂秦故地可全而有也又田肯賀高帝曰陛下治秦中秦形勢之國帶河阻山持戟百萬秦得百二焉地勢便利其以下兵於諸侯猶居高屋之上建瓴水也自是漢始都之景帝分置左右內史此爲右內史武帝太初元年改內史爲京兆尹與左馮翊右扶風謂之三輔其輔俱在長安古城中

三輔治所

京兆在古城南尚冠里

京大也天子曰兆民公羊曰京大也師衆也天子所居

馮翊在古城內太上皇廟西南

馮憑也翊輔也翊輔京師也其地今同州

扶風在夕陰街北

扶持也助也言助風化今岐州

三輔者謂主爵中尉及左右內史漢武帝改曰京兆尹左

馮翊右扶風其治長安城中是爲三輔三輔郡皆有都尉

如諸郡京輔都尉治華陰左輔都尉治高陵右輔都尉治

郿王莽分長安城旁六鄉置師各一人分三輔爲六都尉

渭城安陵以西北至栒邑義渠十縣屬京尉大夫府居故

長安寺高陵以北十縣屬師尉大夫府居故廷尉府新豐

以東至湖十縣屬翊尉大夫府居城東霸陵杜陵以東至
藍田西至武功郁夷十縣屬光祿大夫府居城西茂陵槐
里以西至汧十縣屬扶尉大夫府居城西長陵池陽以北
役租十縣屬列尉大夫府居城北後漢光武之後扶風出
治槐里馮翊出治高陵按百官表顏師古注引黃圖云京
北在尚冠前街東入故中尉府馮
翊在太上皇廟西入右扶風在夕陰街北入故主爵府長
安以東爲京北長陵以北爲左馮翊渭北以西爲右扶風

咸陽故城

在今咸陽
東二十里

自秦孝公至始皇帝胡亥並都此城案孝公十二年作咸
陽築冀闕徙都之始皇二十六年徙天下高貲富豪於咸
陽十二萬戶諸廟及臺苑皆在渭南秦每破諸侯徹其宮

室作之咸陽北坂上南臨渭自雍門以東至涇渭殿屋複道周閣相屬所得諸侯美人鍾鼓以充之二十七年作信宮渭南已而更命信宮爲極廟象天極自極廟道通驪山作甘泉前殿築甬道自咸陽屬之始皇窮極奢侈築咸陽宮因北陵營殿端門四達以制紫宮象帝居引渭水灌都以象天漢橫橋南渡以法牽牛橋廣六丈南北二百八十八步六十八閒八百五十柱二百一十二梁橋之南北隄繳立石柱咸陽北至九巖甘泉南至鄠杜東至河西至汧渭之交東西八百里南北四百里離宮別館相望聯屬木衣綈綉土被朱紫宮人不移樂不改懸窮年忘歸猶不能徧

宮 馳道閣

黃陽宮秦文王所起在今鄠縣西南二十三里棧陽宮秦昭王所作在今岐州扶風縣東北

西垂宮文公元年居西垂宮

平陽封宮武公元年伐彭戲氏至于華山下居於平陽封宮

橐泉宮皇覽曰秦穆公冢在橐泉宮祈年觀下步高宮在新豐縣亦名市丘城

步壽宮在新豐縣步高宮西

號宮秦宣太后起在今岐州號縣界

長楊宮在今盩厔縣東南三十里本秦舊宮至漢修飾之以備行幸宮中有垂楊數畝因爲宮名門曰射熊觀秦漢游獵之所

蘄年宮穆公所造廟記曰蘄年宮在城外秦始皇本紀蘄年宮在雍

梁山宮始皇幸梁山在好時

信宮亦曰咸陽宮

解在前

興樂宮秦始皇造漢修飾之周回二十餘里漢太后常居之

朝宮始皇三十五年以咸陽人多先王之宮庭小曰吾聞

周文王都豐武王都鎬豐鎬之間帝王之都也乃營朝宮

於渭南上林苑庭中可受十萬人車行酒騎行炙千人唱

萬人和收天下兵古以銅爲兵聚之咸陽銷以爲鍾鑪高三丈

鍾小者皆千石也銷鋒鏑以爲金人十二以弱天下之人

立於宮門三輔舊事云鑄金狄人立阿房殿前坐高三丈銘其後曰皇帝二

十六年初兼天下改諸侯爲郡縣一法律同度量大人來

見臨洮其大五丈足跡六尺銘李斯篆蒙恬書董卓悉椎

破銅人銅臺以爲小錢英雄記曰昔大人見臨洮而銅人

鑄臨洮生卓而銅人毀天下大亂卓身滅抑有以也餘二

人魏明帝欲徙詣洛陽清明門裏載至霸城重不可致便

留之

阿房宮亦曰阿城惠文王造宮未成而亡始皇廣其宮規

恢三百餘里離宮別館彌山跨谷輦道相屬閣道通驪山

八十餘里表南山之巔以爲闕絡樊川以爲池作阿房前

殿東西五十步南北五十丈上可坐萬人下建五丈旗以

木蘭爲梁以磁石爲門磁石門乃阿房北闕門也門在阿房前悉以磁石爲之故專其目令

四夷朝者有隱甲懷刃入門而脅止以示神亦曰却胡門周馳爲複道度渭屬之咸陽

以象太極閣道抵營室也阿房宮未成欲更擇令名名之

作宮阿基旁故天下謂之阿房宮隱宮徒刑者七十餘萬

人乃分作阿房宮

或作驪山蘭池宮始皇三十一年爲微行咸陽與武士四人俱夜出逢盜蘭池注渭城縣有蘭池宮

鍾宮在鄠縣東北二十五里始皇收天下兵銷爲鍾鐻此或其處也

馳道按秦本記始皇二十七年治馳道注曰馳道天子道也蔡邕曰馳道天子所行道也今之中道然漢書賈山傳曰秦爲馳道於天下東窮燕齊南極吳楚江湖之上濱海之觀畢至道廣五十步三丈而樹厚築其外隱以金椎樹以青松漢令諸侯有制得行馳道中者行道旁無得行中夾三丈也不如令沒入其車馬

雲閣二世所造起雲閣欲與南山齊

望夷宮在涇陽縣界長平觀道東北臨涇水以望北夷以爲宮名

林光宮胡亥所造縱廣各五里在雲陽縣界

漢長安故城

漢之故都高祖七年方修長安宮城自櫟陽徙居此城本秦離宮也初置長安城本狹小至惠帝更築之按惠帝元年正月初城長安城三年春發長安六百里內男女十四萬六千人三十日罷城高三丈五尺下闊一丈五尺六月發徒隸二萬人常役至五年復發十四萬五千人三十日

乃罷九月城成高三丈五尺下闊一丈五尺上闊九尺雉高三坂周回六十五里城南爲南斗形北爲北斗形至今人呼漢京城爲斗城是也漢舊儀曰長安城中經緯各長三十二里十八步地九百七十三頃八街九陌三宮九府三廟十二門九市十六橋地皆黑壤今赤如火堅如石父老傳云盡鑿龍首山土爲城水泉深二十餘丈樹宜槐與榆松柏茂盛焉城下有池周繞廣三丈深二丈石橋各六丈與街相直

秦漢風俗

漢志曰秦有四塞之固昔后稷封釐公劉處豳太王徙岐

文王作豐武王治鎬其民有先王遺風好稼穡本業故豳詩言農桑衣食之業甚備秦都咸陽徙天下豪富十二萬戶漢高帝都長安徙齊諸田楚昭屈景及諸功臣於長陵後世世徙吏二千石高貲富人及豪傑兼并之家於諸陵強本弱末以制天下是故五方錯雜風俗不一貴者崇侈靡賤者薄仁義富強則商賈爲利貧窶則盜賊不禁閭里嫁娶尤尙財貨送死過度故漢之京輔號爲難理古今之所同也

都城十二門

長安城東出南頭第一門霸城門民見門色青名曰青城

門或曰青門門外舊出佳瓜廣陵人邵平爲秦東陵侯秦破爲布衣種瓜青門外瓜美故時人謂之東陵瓜廟記曰霸城門亦曰青綺門漢書王莽天鳳三年霸城門災莽更霸城門曰仁壽門無疆亭

長安城東出第二門曰清明門一曰籍田門以門內有籍田倉一曰凱門漢書平帝元始四年東風吹屋瓦且盡卽此門也漢宮殿疏曰第二門名城東門莽更名曰宣德門布恩亭

長安城東出北頭第一門曰宣平門民間所謂東都門漢書曰成帝建始元年有白蛾羣飛蔽日從東都門至枳道

又疏廣太傅受少傅上疏乞骸骨歸公卿大夫爲設祖道
供張東都門外卽此門也其郭門亦曰東都卽逢萌掛冠
處也王莽更名春王門正月亭東都門至外郭亭十三里
長安城南出東頭第一門曰覆盜門一號杜門廟記曰覆
盜門與洛門相去十三里二百一十步門外有魯班輪所
造橋工巧絕世長樂宮在城中近東直杜門其南有下杜
城漢書集註云故杜陵之下聚落也故曰下門又曰端門
北對長樂宮漢書曰戾太子所斫覆盜門出奔湖王莽更
名曰永清門長茂亭

長安城南出第二門曰安門亦曰鼎路門北對武庫王莽

更名曰光禮門顯樂亭

長安城南出第三門曰西安門北對未央宮亦曰便門卽
平門也古者平便皆同字武帝建元二年初作便門橋跨
渡渭水上以趨陵其道易直三輔決錄曰長安城西門曰
便橋橋北與門對因號便橋王莽更名曰信平門誠正亭
長安城西出南頭第一門曰章城門漢宮殿疏曰章城門
漢城西面南頭第一門三輔舊事曰章門亦曰光畢門又
曰便門漢書成帝元延元年章城門牡自亡顏師古注云
牡所以下閉
者也亦以
鐵爲之

王莽改曰萬秋門億年亭
長安城西出第二門曰直城門漢宮殿疏曰西出南頭第

二門也亦曰故龍樓門門上有銅龍本名直門王莽更曰直道門端路亭

長安城西出北頭第一門曰雍門本名西城門王莽改曰章義門著義亭其水北入有亟里民呼曰亟里門

長安城北出東頭第一門曰洛城門又曰高門漢宮殿疏曰高門長安北門也又名鸛雀臺門外有漢武承露盤在臺上

長安城北第二門曰廚城門長安廚在門內因爲門名王莽更名建子門廣世亭

長安城北出西頭第一門曰橫門漢書虎上小女陳持弓

走入光門卽此門也門外有橋曰橫橋

漢書作走入橫城門如淳曰橫音光

漢城門皆有候門候主候時謹啓閉也三輔決錄曰長安城面三門四面十二門皆通達九達以相經緯衢路平正可並列車軌十二門三塗洞闕隱以金椎周以林木左右出入爲往來之徑行者升降有上下之別班固西都賦云披三條之廣路立十二之通門又張衡西京賦云城郭之制則旁開三門參塗夷庭方軌十二街衢相經是也

長安九市

廟記云長安市有九各方二百六十六步六市在道西三市在道東凡四里爲一市致九州之人在突門夾橫橋大

道市樓皆重屋又曰旗亭樓在杜門大道南又有當市樓有令署以察商賈貨財買賣貿易之事三輔都尉掌之直市在富平津西南二十五里卽秦文公造物無二價故以直市爲名張衡西京賦云郭開九市通闐帶闐旗亭重立俯察百隧是也又按郡國志長安大俠黃子夏居柳市司馬季主卜於東市晁錯朝服斬於東市西市在醴泉坊

長安八街九陌

有香室街夕陰街尙冠前街三輔舊事云長安城中八街九陌漢書劉屈氂妻梟首華陽街京兆尹張敞走馬章臺街陳湯斬郅支王首縣藁街張衡西京賦云參塗夷庭街

衢相經廛里端直薨宇齊平是也

長安城中閭里

長安閭里一百六十室居櫛比門巷修直有宣明建陽昌陰尙冠修城黃棘北煥南平等里漢書萬石君奮徙家長安戚里宣帝在民間時常在尙冠里劉向列女傳節女長安大昌里人也

宮

長樂宮本秦之興樂宮也高皇帝始居櫟陽七年長樂宮成徙居長安城三輔舊事宮殿疏皆曰興樂宮秦始皇造漢修飾之周回二十里前殿東西四十九丈七尺兩杼中

三十五丈深十二丈長樂宮有鴻臺有臨華殿有温室殿
有信宮長秋永壽永寧四殿高帝居此宮後太后常居之
孝惠至平帝皆居未央宮漢書宣帝元康四年神爵五采
以萬數集長樂宮五鳳三年鸞鳳集長樂宮東闕中樹上
王莽改長樂宮爲常樂室在長安中近東直杜門

未央宮漢書曰高祖七年蕭何造未央宮立東闕北闕

闕門

觀也劉熙釋名曰闕在門兩旁中央闕然爲道也門闕天子號令賞罰所由出也未央宮殿雖南向而上書奏事謁見之徒皆在北闕焉是則以北闕爲正門而又有東闕東門至於西南兩面無門闕矣蓋蕭何立未央宮以厭勝之術理前殿武庫
藏兵器之處也
太倉廩粟所在一百三十
上見其

壯麗甚怒曰天下匈匈勞苦數歲成敗未可知是何治宮

室過度也何對曰以天下未定故可因以就宮室且天子

以四海為家非令壯麗無以重威無令後世有以加也上

悅自櫟陽徙居焉未央宮周回一十八里前殿東西五十

丈深十五丈高三十五丈前殿曰路寢見諸侯羣臣處也營未央宮因龍

首山以制前殿山長六十里頭入渭水尾達樊川秦時有黑龍從南山出飲渭水其行道因成土山

疏山為臺殿不假板築高出長安城西京賦所謂疏龍首以抗前殿此也至孝武以木蘭為焚

燎木蘭香木文杏為梁柱杏木之有文者金鋪玉戶金鋪扉上有金華中作獸

及龍蛇鋪首以銜環也華榱璧璫雕楹玉碣楹柱也碣重軒柱下石也

鏤檻青鎖丹墀青鎖窗也左城右平右乘車上故使之平左以人上故為之背

級城塔黃金為壁帶閒以和氏珍玉風至其聲玲瓏然也級也

未央宮有宣室麒麟金華承明武臺鈎弋等殿又有殿閣三十有二有壽成萬歲廣明椒房清涼水延玉堂壽安平就宣德東明飛羽鳳皇通光曲臺白虎等殿廟記云未央宮有增成昭陽殿漢宮殿疏曰未央宮有麒麟閣天祿閣有金馬門青瑣門玄武蒼龍二闕朱鳥堂畫堂甲觀非常室又有鈎盾署弄田三輔決錄曰未央宮有延年殿合歡殿四車殿又漢宮閣記云未央宮有宣明長年溫室昆德四殿又有玉堂增盤閣宣室閣三輔舊事云武帝於未央宮起高門武臺殿漢武故事云神明殿在未央宮王莽改未央宮曰壽成室前殿曰王路堂如路寢也按舊圖漸臺

織室凌室皆在未央宮

建章宮武帝太和元年柏梁殿災粵巫勇之曰粵俗有火

災即復起大屋以厭勝之帝於是作建章宮度為千門萬

戶宮在未央宮西長安城外帝於未央宮營造日廣以城

中為小乃於宮西跨城池作飛閣通建章宮構輦道以上

下輦道為閣道可宮之正門曰閶闔閶闔天門也宮門名

高二十五丈亦曰璧門左鳳闕闕上有金鳳高丈餘漢書

呼貞女樓即高二十五丈右神明臺言臺高神明門內北

起別風闕在閶闔門內以其出宮垣識高五十丈對峙井

幹樓高五十丈輦道相屬焉連閣皆有罽毼連閣曲閣也

以覆重刻垣

墉屏翳之處畫以雲氣鳥獸其形罍罍然前殿下視未央其西則廣中殿受萬人三輔舊事云建章周回三十里東起別風闕高二十五丈乘高以望遠又於宮門北起圓闕高二十五丈上有銅鳳皇赤眉賊壞之西京賦云圓闕聳以造天若雙碣之相望是也廟記云建章宮北門高二十五丈建章北闕門也又有鳳皇闕漢武帝造高七十丈五尺鳳皇闕一名別風闕又云嵯嶢闕在圓闕門內二百步繁欽建章序云秦漢規模廓然泯毀惟建章鳳闕聳然獨存雖非象魏之制亦一代之巨觀古歌云長安城西有雙闕上有雙銅雀一鳴五穀成再鳴五穀熟按銅雀卽銅鳳皇也楊震關輔古語

云長安民俗謂鳳皇闕爲貞女樓

司馬相如賦云豫章貞女樹長千仞大連抱冬

夏常青未嘗凋落若有貞節故以爲名

漢書曰建章宮南有玉堂壁門三層

臺高三十丈玉堂內殿十二門階陛皆玉爲之鑄銅鳳高五尺飾黃金棲屋上下有轉樞向風若翔椽首薄以璧玉因曰璧門建章有駘蕩馭娑枌詣天梁奇寶鼓簧等宮又有玉堂神明堂疏圃鳴鸞奇華銅柱函德二十六殿太液池唐中池

桂宮漢武帝造周回十餘里漢書曰桂宮有紫房複道通未央宮關輔記云桂宮在未央北中有明光殿土山複道從宮中西上城至建章神明臺蓬萊山三秦記未央宮漸

臺西有桂宮中有明光殿皆金玉珠璣爲簾箔處處明月
珠金玳玉堦晝夜光明又西京雜記云武帝爲七寶牀雜
寶案廁寶屏風列寶帳設於桂宮時人謂爲四寶宮

長安
誌曰

桂宮在未央宮
北亦曰北宮

北宮在長安城中近桂宮俱在未央宮北周回十里高帝
時制度草創孝武增修之中有前殿廣五十步珠簾玉戶
如桂宮漢書曰呂太后崩孝惠皇后廢處北宮又曰哀帝
崩貶皇太后趙氏爲孝成皇后退居北宮皇后薄氏退居
桂宮

甘泉宮一曰雲陽宮史記秦始皇二十七年作甘泉宮及

前殿築甬道築垣牆如街巷自咸陽屬之關輔記曰林光宮一

曰甘泉宮秦所造在今池陽縣西故甘泉山宮以山為名

或曰高泉山蓋習俗語訛爾宮周匝十餘里漢武帝建元中增廣之周

十九里去長安三百里望見長安城黃帝以來圓丘祭天

處漢志雲陽縣有休屠金人徑路神祠三所音義云匈奴祭天處本雲陽甘泉山下秦奪其地徙休屠右地郊祀

志云徑路神祠祭休屠王處遁甲開山圖云雲陽先生之墟也武帝造

闕於南以象方色於甘泉宮更置前殿始造宮室有芝生

甘泉殿邊房中房中樂有芝草之歌漢舊儀云芝有九莖芝草歌曰九莖連葉

芝金色綠葉朱實夜有光乃作芝房之歌帝又起紫殿雕

文刻鏤黼黻以玉飾之成帝永始四年行幸甘泉郊泰時

神光降於紫殿今按甘泉谷北岸有槐樹今謂玉樹根幹
盤峙三二百年木也楊震關輔古語云耆老相傳咸以謂
此樹卽楊雄甘泉賦所謂玉樹青葱也甘泉有高光宮又
有林光宮有長定宮竹宮通天臺通靈臺武帝作迎風館
於甘泉山後加露寒儲胥二館皆在雲陽甘泉中西廂起
彷徨觀築甘泉苑建元中作石闕封巒鳩鵲觀於苑垣內
宮南有昆明池苑南有棠梨宮

漢未央長樂甘泉宮四面皆有公車

公車主受
章疏之處

司馬門凡

言司馬者宮垣之內兵衛所在司馬主武事故謂宮之外
門爲司馬門按漢宮衛令諸出入殿門公車司馬門者皆

下不如令罰金四兩王莽改公車司馬門曰王路四門分

命諫大夫四人受章疏以通下情百官衛尉屬官有公車司馬令丞漢官儀云公

車司馬掌殿司馬門夜徵宮中天下上事及闕下凡所徵召皆總領之令秩六百石

長樂未央建章北宮甘泉宮中宮室臺殿

鴻臺秦始皇二十七年築高四十丈上起觀宇帝嘗射飛

鴻于臺上故號鴻臺漢書惠帝四年長樂宮鴻臺災臨華

殿在長樂宮前殿後武帝建漢書成帝永始四年長樂宮

臨華殿災溫室殿按漢宮殿疏在長樂宮又漢宮閣記在

未央宮

長信宮漢太后常居之按通靈記太后成帝母也后宮在

西秋之象也秋主信故宮殿皆以長信長秋爲名又永壽

永寧殿皆后所處也

成帝母王太后居長信宮

右長樂宮

宣室温室清涼皆在未央宮殿北宣明廣明皆在未央殿東昆德玉堂皆在未央殿西

宣室未央前殿正室也淮南子曰周武王殺紂於宣室漢取舊名也漢書曰文帝受釐宣室夜半前席賈生問鬼神之事卽此也又王莽地皇四年城中少年朱弟張魚等燒宮莽避火宣室前殿火輒隨之

温室殿武帝建冬處之温暖也西京雜記曰温室以椒塗

壁被之文繡香桂爲柱設火齊屏風鴻羽帳規地以麝寶
毳氍漢書曰孔光爲尙書令歸休與兄弟妻子燕語終不
及朝省政事或問溫室省中樹何木光不應

漢書京房奏
考功課吏法

上令公卿朝
臣會議溫室

清涼殿夏居之則清涼也亦曰延清室漢書曰清室則中
夏含霜卽此也董偃常臥延清之室以畫石爲牀文如錦
紫琉璃帳以紫玉爲盤如屈龍皆用雜寶飾之侍者於外
扇偃偃曰玉石豈須扇而後涼邪又以玉晶爲盤貯冰於
膝前玉晶與冰同潔侍者謂冰無盤必融濕席乃拂玉盤
墜冰玉俱碎玉晶千塗國所貢也武帝以此賜偃

麒麟殿未央宮有麒麟殿漢書哀帝燕董賢父子於麒麟殿視賢曰吾欲法堯禪舜如何王閔曰天下乃高皇帝天下非陛下之天下也陛下奉承宗廟當傳之無窮安可妄有所授帝業至重天子無戲言上默然不悅

金華殿未央宮有金華殿漢書曰成帝初方向學召鄼寬也張禹說尙書論語於金華殿中

承明殿未央宮有承明殿著述之所也班固西都賦序云內有承明著作之庭卽此也漢書武帝謂嚴助曰君厭承明之廬又成帝鴻嘉二年雉飛集承明殿屋

蒼龍白虎朱雀玄武天之四靈以正四方王者制宮闕殿

閣取法焉

掖庭宮

在天子左右如肘膝

椒房殿在未央宮以椒和泥塗取其溫而芬芳也武帝時

後宮八區有昭陽飛翔增成合歡蘭林披香鳳皇鴛鴦等

殿後有增修安處常寧茝若椒風發越蕙草等殿爲十四

位成帝趙皇后居昭陽殿

號飛燕以其體輕也

有女弟俱爲婕妤貴

傾後宮昭陽舍蘭房椒壁其中庭彤朱而庭上髹漆切皆

銅沓

切門限也

黃金塗白玉階壁帶往往爲黃金釭函藍田璧

明珠翠羽飾之自後宮未嘗有焉班婕妤居增成舍

後宮八區

增成第三區也

哀帝時董賢女弟爲昭儀居舍號曰椒風

高門殿漢書曰汲黯請見高門注曰未央宮高門殿也又
哀帝時鮑宣諫曰陛下擢臣巖穴誠冀有益毫毛豈欲臣
美食大官重高門之地

非常室漢書成帝綏和二年鄭通里人王褒絳衣小冠帶

劔入北司馬門殿東門上前殿至非常室中殿上解帷組

結佩之召前殿署長業等曰天命令我居此業等收縛考

問乃故公車大誰卒病狂易不自知入宮下獄死大誰者主問非

常之人誰以誰何稱因用為官名有大誰長令此卒者長所領士卒也狂易謂病狂而變易其常也

織室在未央宮又有東西織室織作文繡郊廟之服有令

史

凌室在未央宮藏冰之所也豳詩七月篇曰納于凌陰周官凌人職掌藏冰大祭祀飲食則供冰漢書惠帝四年織室凌室災

暴室主掖庭織作染練之署謂之暴室取暴曬爲名耳有嗇夫官屬

弄田在未央宮弄田者燕遊之田天子所戲弄耳漢書昭帝記曰始元元年上耕于鈎盾弄田應劭注云帝時年九歲未能親耕帝籍鈎盾宮宦者近署故往試耕爲戲弄成帝建始三年小女陳持弓年九歲闌入尙方掖門至未央殿鈎盾禁中

內謁者署在未央宮屬少府續漢書云掌宮中步帳褻物
丁孚漢官云令秩千石

金馬門宦者署武帝時大宛馬以銅鑄像立於署門因以
爲名東方朔主父偃嚴安徐樂皆待詔金馬門卽此

路軫廐在未央宮中掌宮中輿馬亦曰未央廐漢書曰武
帝時期門郎上官桀遷爲未央廐令

右未央宮

駘蕩宮春時景物駘蕩滿宮中也

馭娑宮馭娑馬行疾貌馬行迅疾一日之間遍宮中言宮
之大也

枌詣宮枌詣木名宮中美木茂盛也

天梁宮梁木至於天言宮之高也四宮皆在建章宮

奇華殿在建章宮旁四海夷狄器服珍寶火浣布切玉刀
巨象大雀獅子宮馬充塞其中

鼓簧宮漢宮閣疏云鼓簧宮周匝一百三十步在建章宮
西北

神明臺漢書曰建章有神明臺廟記曰神明臺武帝造祭
仙人處上有承露盤有銅仙人舒掌捧銅盤玉杯以承雲
表之露以露和玉屑服之以求仙道長安記仙人掌大七
圍以銅爲之魏文帝徙銅盤折聲聞數十里

右建章宮

壽宮北宮有神仙宮壽宮張羽旗設供具以禮神君神君來則肅然風生帷帳皆動

明光宮武帝太初四年秋起在長樂宮後南與長樂宮相連屬漢書元后傳曰成都侯商嘗疾欲避暑從上借明光殿蓋卽此王莽建國元年改明光宮爲安館安定太后居之

太子宮甲觀太子宮有甲觀畫堂

漢書注曰甲者甲乙丙丁之次也

漢書

曰孝成皇帝元帝太子也母曰王皇后元帝在太子宮生甲觀畫堂元后傳曰見於丙殿此其例也畫堂謂宮殿中

彩畫之堂

右北宮

鈎弋宮列仙傳曰鈎弋夫人姓趙氏河閒人少好酒病臥六年右手鈎卷飲食少望氣者云東北有貴人推而得之見召姿色佳麗武帝反其手得玉鈎而手展有寵生昭帝姪娠十四月上曰聞昔堯十四月而生今鈎弋亦然乃命所生門曰堯母門所居曰鈎弋宮自夫人加婕妤後得罪掖庭獄死及殯香一月昭帝卽位追尊爲皇太后更葬之發六十二萬人起陽陵其棺槨但有彩履王褒雲陽記曰鈎弋夫人從至甘泉而卒尸香聞十餘里葬雲陽武帝思

之起通靈臺於甘泉宮有一青鳥集臺上往來至宣帝時
乃不至漢武故事曰鈎弋宮在直門之南

昭臺宮在上林苑中孝宣霍皇后立五年廢處昭臺宮後
十二歲徙雲林館乃自殺

長定宮林光宮中有長定宮三輔決錄曰后從帝行幸於
甘泉宮居長定宮孝成許皇后廢處昭臺宮歲餘徙長定
宮

長門宮離宮在長安城孝武陳皇后得幸頗妬居長門宮
永信宮孝哀帝尊恭皇太后曰帝太后稱永信宮
中安宮孝哀帝尊恭皇太后曰帝太后稱中安宮

儲元宮在長安城西漢書外戚傳曰信都太后與信都王俱居儲元宮

犬臺宮在上林苑中長安西二十八里漢書江充召見犬臺宮

葡萄宮在上林苑西漢哀帝元壽三年單于來朝以太歲厭勝所舍之此宮

步壽宮秦亦有步壽宮今按其地與秦異則秦漢各有步壽宮耳漢役栩宮宣帝神爵二年鳳凰集役栩縣鳳凰集處得玉寶乃起步壽宮

梁山宮梁山好時界卽禹貢云壺口治梁及岐又古公踰

梁山于岐下及秦立梁山宮皆北山下也史記秦本紀始皇三十二年幸梁山宮卽此也

黃山宮在興平縣西三十里武帝微行西至黃山宮卽此也

回中宮史記秦始皇二十七年巡隴西北地出笄頭過回中漢書文帝十四年匈奴入蕭關殺都尉燒回中宮候騎至雍武帝元狩四年幸雍過回中道遂北出蕭關又有三良宮相近

集靈宮集仙宮存仙殿存神殿望仙臺望仙觀俱在華陰縣界皆武帝宮觀名也華山記及三輔舊事云昔有太元

真人茅盈內記始皇三十一年九月庚子盈曾祖父濛於
華山乘雲駕龍白日昇天先是邑人謠曰神仙得者茅初
成駕龍上昇入太清時下玄州戲赤城繼世而往在我盈
帝若學之臘嘉平漢武帝內傳曰魯女生長樂人初餌胡
麻乃永絕穀八十餘年少壯色如桃華一日與親知故人
別入華山後五十年先識者逢女於廟前乘白鹿從王母
人因識之謝其鄉里而去又神仙傳曰中山衛叔卿常乘
雲車駕白鹿見漢武帝將臣之叔卿不言而去武帝悔求
得其子度令追其父登華岳見父與數人坐於石上敕度
令還又華山記弘農鄧紹八月曉入華山見童子執五綵

囊盛柏葉露食之武帝卽其地造宮殿歲時祈禱焉漢書云華陰縣有集靈宮又有望仙觀在華陰縣

棠梨宮在甘泉苑垣外雲陽縣南三十里

竹宮甘泉祠宮也以竹爲宮天子居中漢舊儀云竹宮去壇三里

宜春宮本秦之離宮在長安城東南杜縣東近下杜

扶荔宮在上林苑中漢武帝元鼎六年破南越起扶荔宮

宮以荔枝得名以植所得奇草異木菖蒲百本山薑十本甘蕉十

二本留求子十本桂百本密香指甲花百本龍眼荔枝檳

榔橄欖千歲子橘皆百餘本上木南北異宜歲時多枯瘁

荔枝自交趾移植百株于庭無一生者連年猶移植不息後數歲偶一株稍茂終無華實帝亦珍惜之一日萎死守吏坐誅者數十人遂不復蒔矣其實則歲貢焉郵傳者疲斃於道極爲生民之患至後漢安帝時交趾郡守極陳其弊遂罷其貢

五柞宮漢之離宮也在扶風盩厔宮中有五柞樹因以爲名五柞皆連抱上枝覆蔭數畝

宣曲宮在昆明池西孝宣帝曉音律常於此度曲因以爲名

鼎湖宮在湖城縣界

又一說在藍田有亭

昔黃帝採首山銅以鑄鼎

鼎成有龍下迎帝仙去小臣攀龍髯而上者七十二人漢武帝於此建宮

思子宮武帝悟戾太子無辜被殺作思子宮爲歸來望思之臺於湖

萬歲宮武帝造汾陰有萬歲宮宣帝元康四年幸萬歲宮神爵翔集以元康五年爲神爵紀元

首山宮漢武帝元封元年封禪後夢高祖坐明堂朝羣臣於是祀高祖於明堂以配天還作首山宮以爲高靈館

明光宮武帝求仙起明光宮發燕趙美女二千人充之率取二十以下十五以上年滿三十者出嫁之掖庭令總其

籍時有死出者隨補之

池陽宮在池陽南上原之阪有長年阪去長安五十里

養德宮趙王如意年幼未能就外傳戚姬使舊趙王內傅趙媼傅之號其室曰養德宮

右甘泉宮

日華宮河間獻王德築日華宮置客館二十餘區以待學士自奉養甚薄不踰賓客

曜華宮梁孝王好營宮室苑囿之樂作曜華宮築兔園園中有百靈山有膚寸石落猿巖栖龍岫又有雁池池閒有鶴洲鳧渚其諸宮觀相連延亘數十里奇果異樹珍禽怪

獸畢有王日與宮人賓客弋釣其中

右日華曜華宮營構不在三輔然皆漢之諸王所建
以附宮室篇末

漢畿內千里並京兆治之內外宮館一百四十五所班固
西都賦云前乘秦嶺後越九嶷東薄河華西涉岐雍宮館
所歷百有餘區秦離宮二百漢武帝往往修治之

三輔黃圖卷上終

三輔黃圖卷之下

王桂生百藥

亡名氏撰

樵李沈 璜若水校

張文林禹玉

苑囿

周靈囿文王囿也詩曰王在靈囿麇鹿攸伏麇鹿濯濯白鳥騫騫毛萇註曰囿所以域養禽獸也天子百里諸侯四十里靈者言文王之有靈德也靈囿言道行於苑囿也孟子曰文王之囿方七十里芻蕘者往焉雉兔者往焉與民同其利也文王靈囿在長安縣西四十二里漢上林苑卽

秦之舊苑也漢書云武帝建元三年開上林苑東南至藍田宜春鼎湖御宿昆吾旁南山而西至長楊五柞北繞黃山瀕渭水而東周袤二百里離宮七十所皆容千乘萬騎漢宮殿疏云方三百四十里漢官舊儀云上林苑方三百里苑中養百獸天子秋冬射獵取之帝初修上林苑羣臣遠方各獻名果異卉三千餘種植其中亦有製爲美名以標奇異茂陵富民袁廣漢藏錙鉅萬家僮八九百人於北山下築園東西四里南北五里激流水注其中構石爲山高十餘丈連延數里養白鸚鵡紫鴛鴦犛牛青兕奇獸珍禽委積其閒積沙爲洲嶼激水爲波濤致江鷗海鶴孕雛

產穀延漫林池奇樹異草靡不培植屋皆徘徊連屬重閣
修廊行之移晷不能徧也廣漢後有罪誅沒入爲官園鳥
獸草木皆移入上林苑中上林苑有昆明觀武帝置又有
繭觀平樂觀遠望觀燕昇觀觀象觀便門觀白鹿觀三爵
觀陽祿觀陰德觀鼎郊觀樛木觀椒唐觀魚鳥觀元華觀
走馬觀柘觀上蘭觀卽池觀當路觀皆在上林苑又舊儀
曰上林有令有尉禽獸簿記其名數又有上林詔獄主治
苑中禽獸宮館之事屬水衡又上林苑中有六池市郭宮
殿魚臺犬臺獸圈

甘泉苑武帝置緣山谷行至雲陽三百八十一里西入扶

風凡周回五百四十里苑中起宮殿臺閣百餘所有仙人觀石闕觀封巒觀鳩鵲觀

御宿苑在長安城南御宿川中漢武帝爲離宮別館禁御人不得入往來遊觀止宿其中故曰御宿三秦記云御宿園出栗十五枚一勝大梨如五勝落地則破其取梨先以布囊承之號曰含消此園梨也

思賢苑孝文帝爲太子立思賢苑以招賓客苑中有堂室六所客館皆廣廡高軒屏風幃褥甚麗廣陵王胥有勇力常於別園學格熊後遂能空手搏之莫不絕脰後爲獸所傷陷腦而死

博望苑武帝立子據爲太子爲太子開博望苑以通賓客
漢書曰武帝年二十九乃得太子甚喜太子冠爲立博望
苑使之通賓客從其所好又云博望苑在長安城南杜門
外五里有遺趾

西郊苑漢西郊有苑囿林麓數澤連亘繚以周垣四百餘
里離宮別館三百餘所

三十六苑漢儀注太僕牧師諸苑三十六所分布北邊西
邊以郎爲苑監宦官奴婢三萬人養馬三十萬匹養鳥獸
通名爲苑故謂之牧馬處爲苑

樂遊苑在杜陵西北宣帝神爵三年春起

宜春下苑在京城東南隅元帝紀注東南隅曲池是

梨園雲陽宮記曰雲陽車箱坂下有梨園一頃梨數百株

青翠繁密望之如車蓋

池沼

周文王靈沼在長安西三十里詩曰王在靈沼於初魚躍漢昆明池

武帝元狩四年穿在長安西南周回十里西南夷傳曰天

子遣使求身毒國市竹身毒國即天竺也漢書曰張騫言使大夏時見蜀布邛竹杖問所從

來曰從東來身毒國可數千里得賈蜀人市而為昆明所閉天子欲伐之越雋

昆明國有溟池方三百里故作昆明池以象之以習水戰

因名曰昆明池漢書曰元狩三年滅隴西北地上郡戍卒之半及吏弄法者謫之穿此池食貨

志曰時越欲與漢用船戰逐水戰相逐也乃大修昆明池也三

輔舊事曰昆明池地三百三十二頃中有戈船各數十樓

船百艘船上建戈矛四角悉垂幡旄葆麾蓋照燭涯涘圖

曰上林苑有昆明池周匝四十里廟記曰池中後作豫章

大船可載萬人上起宮室因欲遊戲養魚以給諸陵祭祀

餘付長安廚三輔故事又曰池中有豫章臺及石鯨刻石

爲鯨魚長三丈每至雷雨常鳴吼鬣尾皆動一說甘泉宮

南有昆明池池中有靈波殿皆以桂爲殿柱風來自香又

曰池中有龍首船常令宮女泛舟池中張鳳蓋繡鳳爲飾建華

旗作櫂歌櫂歌謳舟人歌也又曰雜以鼓吹帝御豫章觀臨

觀焉關輔古語曰昆明池中有二石人立牽牛織女於池之東西以象天河張衡西京賦曰昆明靈沼黑水玄址牽牛立其右織女居其左今有石父石婆神祠在廢池疑此是也武帝初穿池得黑土帝問東方朔東方朔曰西域胡人知乃問胡人胡人曰劫燒之餘灰也三秦記曰昆明池中有靈沼名神池云堯時治水嘗停船於此池通白鹿原原人釣魚綸絕而去夢於武帝求去其鈎三日戲於池上見大魚啣索帝曰豈不穀昨所夢邪乃取鈎放之閒三日帝復遊池池濱得明珠一雙帝曰豈昔魚之報邪

鎬池在昆明池之北卽周之故都也廟記曰長安城西有

鎬池在昆明池北周匝二十二里漑地三十三頃史記曰
秦始皇帝三十六年使者從關東夜至華陰縣平舒道有
人持璧遮使者曰爲吾遺鎬池君因言曰今年祖龍死使
者問其故忽不見置其璧去使者奉璧具以聞始皇默然
良久曰山鬼不過知一歲事退言曰祖龍者人之先也祖始
也龍者人主之象謂始皇也使御府視璧乃二十八年渡江所沈璧也
滄池在長安城中舊圖云未央宮有滄池言池水蒼色故
曰滄池

太液池在長安故城西建章宮北未央宮西南太液者言
其津潤所及廣也關輔記云建章宮北有池以象北海刻

石爲鯨魚長三丈漢書曰建章宮北治大池名曰太液池

中起三山以象瀛洲蓬萊方丈刻金石爲魚龍奇禽異獸

之屬瀛洲一名魂洲亦曰濃洲有樹名影木月中視之如列星萬歲一實食之輕骨上有枝葉如蓋羣仙以避

風雨有金鑾之觀飾以環玉直上於雲中有青瑤瓦覆之以雲紈之素刻碧玉爲倒龍之狀懸火精爲日刻黑玉爲

鳥以水精爲月青瑤爲蟾兔於地下爲機戾以測昏明不虧弦望有香風冷然而至有草名芸苗狀如菖蒲食葉則

醉食根則醒有鳥如鳳身紺翼丹名曰藏珠每鳴翔而吐珠累斛仙人以珠飾仙裳蓋輕而耀於日月也蓬萊山亦

名防丘亦名雲來高二萬里廣七萬里水淺有細石如金玉得之不加陶冶自然光淨仙者服之東有鬱夷國時有

金霧諸仙說北上常浮轉低仰有如山上架樓室向明以開戶牖及霧歇滅戶皆向北有浮雲之幹葉青莖紫子大

如珠有青鸞集其上下有砂礫細如粉柔風至葉條翻起拂細砂如雲霧仙者來觀而戲焉風吹竹葉聲如鐘磬方

丈之山名一巒維東方龍場方千里瑤玉爲林雲色皆紫上有通霞臺西王母常遊於其上常有鸞鳳鼓舞如琴瑟

和鳴三山統名崑丘亦曰神仙上有不死之藥食之輕舉
武帝信仙道取少君樂大妄誕之語多起樓觀故池中立
三山以象蓬萊瀛洲方丈廟記曰建章宮北池名太液周四十頃有採

蓮女鳴鶴之舟又按三輔舊事云日出暘谷浴於咸池至

虞淵卽暮此池象之也昭帝始元元年春黃鵠下建章宮

太液池成帝常以秋日與趙飛燕戲於太液池以沙棠木

爲舟沙棠木造舟不沉溺以雲母飾於鷁首一名雲舟又刻大桐木

爲虬龍彫飾如眞夾雲舟而行以紫桂爲柁棹及觀雲棹

之玩擷菱蕖帝每憂輕蕩以驚飛燕命飲飛之士以金鎖

纜雲舟於波上每輕風時至飛燕殆欲隨風入水帝以翠

縷結飛燕之裾常恐曰妾微賤何復得預結纓裾之遊今

太液池尙有避風臺卽飛燕結裾之處

唐中池周回十二里在建章宮太液池之南

百子池戚夫人侍兒賈佩蘭後出爲扶風人段儒妻說在宮內時見戚夫人侍高祖嘗以趙王如意爲言而高祖思之幾半日不言歎息悽愴而未知其術使夫人擊筑高祖歌大風以和之七月七日臨百子池作于闐樂樂闋以五色縷相羈謂之相連愛八月四日出彫房北戶竹下圍棊勝者終年有福負者終年疾病取絲縷就北斗星辰求長命乃免正月上辰出池邊盥濯食蓬餌以祓妖邪三月上巳張樂於池上

十池上林苑有初池麋池牛首池蒯池積草池東陂池西
陂池當路池大臺池郎池牛首池在上林苑中西頭蒯池
生蒯草以織席西陂池郎池皆在古城南上林苑中陂郎
二水名因爲池積草池中有珊瑚樹高一丈二尺一本三
柯上有四百六十二條南越王趙佗所獻號爲烽火樹至
夜景常煥然

少府飲飛外池漢儀注飲飛具繒繳以射鳧雁給祭祀故

有池

元帝紀

秦酒池在長安故城中廟記曰長樂宮中有魚池酒池池
上有肉炙樹秦始皇造漢武行舟於池中酒池北起臺天

子於上觀牛飲者三千人又曰武帝作以夸羗胡飲以鐵
盃重不能舉皆抵牛飲西征賦云酒池監於商辛追覆車
而不悟

影蛾池武帝鑿池以翫月其旁起望鵠臺以眺月影入池
中使宮人乘舟弄月影名影蛾池亦曰眺蟾臺

琳池昭帝元始元年穿林池廣千步池南起桂臺以望遠
東引太液之水池中植分枝荷一莖四葉狀如駢蓋日照
則葉低蔭根莖若葵之衛足名曰低光荷實如玄珠可以
飾佩花葉難萎芬馥之氣徹十餘里食之令人口氣常香
益脉治病宮人貴之每遊燕出入必皆含嚼或剪以爲衣

或折以障日以爲戲弄帝時命水嬉遊燕永日士人進一
豆槽帝曰桂楫松舟其猶重朴況乎此槽可得而乘耶乃
命以文梓爲船木蘭爲柁刻飛燕翔鷁飾於船首隨風輕
漾畢景忘歸起商臺於池上

鶴池在長安城西盤池在西北並廢

冰池在長安西舊圖云西有彪池亦名聖女泉蓋冰彪聲
相近傳說之訛也

臺榭

周文王靈臺在長安西北四十里詩序曰靈臺民始附也
文王受命而人樂其有靈德以及鳥獸昆蟲焉鄭玄注云

天子有靈臺者所以觀祲象察氛祥也文王受命而作邑于豐立靈臺詩曰經始靈臺庶民子來經之營之不日成之劉向新序云周文王作靈臺及爲池沼掘得死人之骨吏以聞于文王文王曰更葬之吏曰此無主矣文王曰有天下者天下之主有一國者一國之主寡人者死人之主又何求主遂令吏以衣棺更葬之天下聞之皆曰文王賢矣澤及枯骨又況於人乎周靈臺高二丈周回百二十步漢靈臺在長安西北八里漢始曰清臺本爲候者觀陰陽天文之變更名曰靈臺郭延生述征記曰長安宮南有靈臺高十五仞上有渾儀張衡所制又有相風銅烏遇風乃

動一日長安靈臺上有相風銅烏千里風至此烏乃動又有銅表高八尺長一丈三尺廣尺二寸題云太初四年造柏梁臺武帝元鼎二年春起此臺在長安城中北門內三輔舊事云以香柏爲梁也帝嘗置酒其上詔羣臣和詩能七言詩者乃得上太初中臺災

漸臺在未央宮太液池中高十丈漸浸也言爲池水所漸又一說漸臺星名法星以爲臺名未央宮有滄池池中有漸臺王莽死於此

神明臺見建章宮

通天臺武帝元封二年作甘泉通天臺漢舊儀云通天者

言此臺高通于天也漢武故事築通天臺於甘泉去地百餘丈望雲雨悉在其下望見長安城武帝時祭泰乙上通天臺舞八歲童女三百人祠祀招仙人祭太乙云令人升通天臺以候天神天神既下祭所若大流星乃舉烽火而就竹宮望拜上有承露盤仙人掌擎玉杯以承雲表之露元鳳間自毀椽桷皆化爲龍鳳從風雨飛去西京賦云通天眇而竦峙徑百常而莖擢上瓣華以交紛下刻隋其若削亦曰候神臺又曰望仙臺以候神明望神仙也

涼風臺在長安故城西建章宮北關輔記曰建章宮北作涼風臺積水爲樓

長樂宮有魚池臺酒池臺秦始皇造又有著室臺鬪雞臺

走狗臺壇臺漢韓信射臺又未央有果臺東西山二臺未

央宮有鈎弋臺通靈臺見宮門望鵠臺眺蟾臺桂臺商臺避

風臺並見池沼門

長楊樹在長楊宮秋冬較獵其下命武士搏射禽獸天子

登此以觀焉臺上有木曰樹

辟廱

周文王辟廱在長安西北四十里亦曰璧廱如璧之圓雍

之以水象教化流行也詩曰於論鼓鍾於樂辟廱毛萇注

云論思也水旋丘如辟廱以節觀者鄭玄注云文王作靈

臺而知人之歸附作靈沼靈囿而知鳥獸之得其所以爲音聲之道與政通故合樂以詳之

漢辟廱在長安西北七里漢書河閒獻王來朝獻雅樂武帝對之三雍宮卽此禮樂志曰成帝時犍爲郡水濱得古磬十六枚劉向說帝宜興辟廱焉

明堂

周明堂明堂所以正四時出教化天子布政之宮也黃帝曰合宮堯曰衢室舜曰總章夏后曰世室殷人曰陽館周人曰明堂先儒舊說其制不同或曰明堂在國之陽大戴禮云明堂九室一室有四戶八牖凡三十六戶七十二牖

以茅蓋屋上圓下方援神契曰明堂上圓下方八牕四牖
考工記云明堂五室稱九室者取象陽數也八牖者陰數
也取象八風三十六戶牖取六甲之爻六六三十六也上
圓象天下方法地八窗卽八牖也四闈者象四時四方也
五室者象五行也皆無明文先儒以意釋之耳禮記明堂
位曰朝諸侯于明堂之位天子負斧依南鄉而立明堂也
者明諸侯之尊卑也制禮作樂頒度量而天下服知明堂
是布政之宮也又孝經曰宗祀文王於明堂以配上帝則
周有明堂也明矣

漢明堂在長安西南七里漢書曰武帝初卽位嚮儒術以

文學爲本議立明堂於城南以朝諸侯應劭注云漢武帝

造明堂王莽修飾令大

漢書武帝建元元年議立明堂遣使者安車蒲輪束帛加璧徵魯申

公又郊祀志初天子封泰山泰山東北陞古時有明堂處處險不敞上欲治明堂奉高帝未曉其制度濟南人公玉帶上黃帝時明堂圖明堂中有四殿四面無壁以茅蓋通水水圍宮垣爲複道上有樓從西南入名曰崑崙天子從之入以拜祀上帝焉於是上令奉高作明堂汶上如帶圖及是歲修封則祀太乙五帝於明堂上坐合高皇帝祀坐對之祠后土於下房以二十太牢天子從崑崙崙道入始拜明堂如郊祀是歲元封五年也本紀元封二年秋作明堂于泰山下五年春三月至泰山增封甲子祠高祖於明堂以配上帝太初元年冬十月行幸泰山十一月甲子朔旦冬至祀上帝于明堂

圓丘

漢圓丘在昆明故渠南有漢故圓丘今按高二丈周回百

二十步

太學

漢太學在長安西北七里董仲舒策曰太學賢士之關教化之本源也王莽作宰衡時建弟子舍萬區起市郭上林苑中三輔舊事云漢太學中有市有獄

宗廟

宗尊也廟貌也所以髣髴先人尊貌也漢立四廟祖宗廟異處不序昭穆太上皇廟在長安西北長安故城中香室街南鴻翔府北關輔記曰在酒池北

高祖廟在長安西北故城中關輔記曰秦廟中鐘四枚皆

在漢高祖廟中三輔舊事云高廟鐘重十二萬斤漢舊儀云高祖廟鐘十枚各受十石撞之聲聞百里漢書文帝時盜取高廟玉環故事又云光武至長安宮闕以宗廟燒蕩爲墟乃徙都洛陽取十廟合於高廟作十二室太常卿一人別治長安主知高廟事高廟有便殿凡言便殿便室便坐者皆非正大之處所以就便安也

高園於陵上作之既有正寢以象平生正殿路寢也又立便殿於寢側以象休息閑宴之處也

孝惠更於渭北建高帝廟謂之原廟惠帝廟在高帝廟後

文帝廟號顧成廟

孝文四年作顧成廟在長安城南文帝自爲廟制度逼狹若顧望而成猶文王

靈臺不日成之
故曰顧成也

景帝廟號德陽宮

景帝中四年造德陽宮蓋帝自作之諱不言廟故號為宮故事云景帝造德陽

宮

武帝廟號龍淵今長安西茂陵東有其處作銅飛龍故以

冠名

武帝元光四年河決濮陽發卒十萬救河決起龍淵之宮取此為名武帝廟不言宮

昭帝廟號徘徊

宣帝廟號樂遊

在杜陵西北神爵三年宣帝立廟於曲池之北號樂遊按其處則今呼樂遊園是也

因樂遊苑得名

元帝廟號長壽

成帝廟號陽池

太上皇高祖父也有寢廟園原廟昭靈后高祖母也武哀王高祖兄也昭

哀后高祖嫂也皆有園孝惠皇帝有寢廟園孝文太后孝昭太

后皆有寢園衛思后戾太子母皇祖悼考皆有廟園宣帝父廟史皇孫

曰奉明

元成之世祖宗廟在郡國者六十八合百六十七所京師

自高祖至宣帝與太上皇悼皇考各自居陵旁立廟并為

百七十六又園中各有寢便殿日祭於寢月祭於殿時祭

於便殿寢日四上食廟歲二十五祠便殿四歲祠又月一

遊衣冠四時祭宗廟用太牢列侯皆獻酎金以助祭諸侯王及

列侯歲時詣京師侍祠助祭漢儀諸侯王歲以戶口酎黃金於漢廟皇

帝臨受獻金金不如斤兩色惡王削縣侯免國注云因八月嘗酌會諸侯廟中出金助祭謂之酌金酌正月旦作酒八月成三重釀醇酒也味厚故以薦宗廟金黃金也不如法者奪爵又冊封諸王必於祖廟冊命之示不敢專也武帝

元狩六年夏四月乙巳立皇子闕爲漢制封皇子爲王者齊王旦燕王胥廣陵王於廟中冊命

其實古諸侯也周末諸侯或稱王而漢天子自以皇帝爲稱故以王號加之總名爲諸侯王

新莽壞徹城西苑中建章承光包陽大臺儲元宮及平樂當路陽祿館凡十餘所取其材瓦以起九廟莽曰予卜波水之北郎池之南惟玉食予又卜金水之南明堂之西亦

惟玉食予將親築於是遂營長安城南提封百頃莽又親
舉築三下九廟一黃帝二虞帝三陳胡王四齊敬王五濟
北愍王六濟南悼王七元成孺王八陽平頃王九新都顯
王殿皆重屋太初祖廟東西南北各四十丈高十七丈餘
廟半之爲銅構櫨飾以金銀珣文窮極百工之巧帶高增
下功費數百鉅萬卒徒死者數萬

南北郊

天郊在長安城南地郊在長安城北所屬掌治壇墀郊宮
歲時供張以奉郊祀武帝定郊祀之事祠太一於甘泉圓
丘取象天形就陽位也祀后土於汾陰澤中方丘取象地

形就陰位也至成帝徙泰畤后土於京師始祀上帝于長安南郊祀后土於長安北郊

社稷

漢初除秦社稷立漢社稷其後又立官社配以夏禹而不

立官稷至平帝元始三年始立官稷於官社之後後漢祭祀志云

黃圖載元始儀甚悉今本無合入元始四年宰衡莽奏曰帝天之義莫大於承天承天之序莫重於郊祀祭天於南

就陽位祠地於北就陰位圓丘象天方澤象地圓方因體南北從位燔燎升氣瘞埋就類牲欲齏粟味尚清玄器成

匏勺貴誠因質天地神所統故類乎上帝禋于六宗望秩山川班於羣臣皇天后土隨王所在而事祐焉甘泉太陽

河東少陽咸失厥位不合禮制聖王之制必上當天心下合地意中攷人事故曰愷悌君子求福不回而求福厥

路不通正月泰卦乾坤合體天地交通萬物聚出其律太族天子親郊天地先祖配天妣配地陰陽之別以日冬至

祀天夏至祀后土君不省方而使有司六宗日月星山川
海星則北辰川卽河山岱宗三光衆明山阜百川衆流滄
汙皋澤以類相屬各數秩望相序於是
定郊祀祀長安南北郊罷甘泉河東祀

觀漢博士劉熹釋名曰
觀觀也於上觀望也

豫章觀武帝造在昆明池中亦曰昆明觀又一說曰上林
苑中有昆明池觀蓋武帝所置桓譚新論云元帝被疾遠
求方士漢中送道士王仲都詔問所能對曰能忍寒乃以
隆冬盛寒日令袒載駟馬於上林昆明池上環以冰而御
駟者厚衣狐裘寒戰而仲都無變色臥於池上曛然自若
卽此也

飛廉觀在上林武帝元封二年作飛廉神禽能致風氣者

身似鹿頭如雀有角而蛇尾文如豹武帝命以銅鑄置觀上因以爲名班固漢武故事曰公孫卿言神人見於東萊山欲見天子上於是幸緱氏登東萊留數日無所見惟見大人跡上怒公孫卿之無應卿懼誅乃因衛青白上云仙人可見而上往遽以故不相值今陛下可爲觀於緱氏則神人可致且仙人好樓居不極高顯神終不降也於是上於長安作飛廉觀高四十丈於甘泉作延壽觀亦如之後漢明帝永平五年至長安悉取飛廉并銅馬置之西門外爲平樂觀董卓悉銷以爲錢

屬玉觀在扶風屬玉水鳥似鷓鴣以名觀也又曰屬玉似

鴨而大長頸赤目紫紺色宣帝甘露二年十一月行幸黃陽宮屬玉觀

青梧觀在五柞宮之西觀亦有三梧桐樹下有石麒麟二枚刊其脇文字是秦始皇驪山墓上物也頭高一丈三尺東邊者前左脚折處有赤如血父老謂其有神皆含血屬筋焉

射熊觀在長楊宮武帝好自擊熊司馬相如從至上林作賦諫楊雄亦作長楊賦

石闕觀封巒觀雲陽宮記云宮東北有石門山岡巒糾紛干霄秀出有石巖容數百人上起甘泉觀甘泉賦云封巒石闕弭迤乎延屬

白楊觀在昆明池東

長平觀在池陽宮臨涇水

龍臺觀在豐水西北近渭

涿木觀在上林苑

細柳觀在長安西北三輔舊事云漢文帝大將軍周亞夫

軍於細柳今呼古徼是也

成山觀成山在東萊不夜縣於其上築宮闕以為觀成山觀不

在三輔例見宮室門

仙人觀霸昌觀蘭池觀安臺觀淪沮觀在城外又有禁觀

董賢觀蒼龍觀當市觀旗亭樓馬騫樓在城內

麒麟朱鳥龍興含章皆館名

閣

石渠閣蕭何造其下礮石爲渠以導水若今御溝因爲閣名所藏入關所得秦之圖籍至於成帝又於此藏祕書焉

三輔故事曰石渠閣在未
央宮殿北藏祕書之所

天祿閣藏典籍之所漢宮殿疏云天祿麒麟閣蕭何造以藏祕書處賢才也劉向於成帝之末校書天祿閣專精覃思夜有老人著黃衣植青藜杖叩閣而進見向暗中獨坐誦書老父乃吹杖端煙然因以見向授五行洪範之文恐詞說繁廣忘之乃裂裳及紳以記其言至曙而去請問姓名云我是太乙之精天帝聞卯金之子有博學者下而觀

焉乃出懷中竹牒有天文地圖之書曰余略授子焉至子
歆從授其術向亦不悟此人焉

麒麟閣廟記云麒麟閣蕭何造漢書宣帝思股肱之美乃
圖霍光等十一人於麒麟閣

三秦記云未央宮有堯閣廟記云未央宮有白虎閣屬車
閣

署

虎威章溝皆署名漢有長水中壘屯騎虎賁越騎步兵射
聲胡騎八營宿衛王宮周廬直宿處

庫

武庫在未央宮蕭何造以藏兵器

靈金內府太上皇微時佩一刀長三尺上有銘字難識傳云殷高宗伐鬼方時所作也上皇遊豐沛山中寓居窮谷有人冶鑄上皇息其旁問曰鑄何器工者笑曰爲天子鑄劍慎勿言曰得公佩劍雜而冶之卽成神器可克定天下昴星精爲輔佐木衰火盛此爲異兆上皇解匕首投爐中劍成殺三牲以釁祭之工問何時得此上皇曰秦昭襄王時余行陌上一野人授余云是殷時靈物工卽持劍授上皇上皇以賜高祖高祖佩之斬白蛇是也及定天下藏於寶庫守藏者見白氣如雲出戶狀若龍蛇呂后改庫曰靈

金藏惠帝卽位以此庫貯禁兵器名曰靈金內府

倉

太倉蕭何造在長安城外東南文景節儉太倉之粟紅腐而不可食

細柳倉嘉倉在長安西渭水北古徼西有細柳倉城東有嘉倉

廐

未央大廐在長安故城中漢官儀曰未央宮六廐長樂承華等廐令皆秩六百石

翠華廐大輅廐果馬廐軛梁廐騎馬廐大宛廐胡河廐騊

駮廐皆在長安城外

霸昌觀馬廐在長安城外

都廐天子車馬所在

中廐皇后車馬所在

圈

秦獸圈烈士傳云秦王召魏公子無忌不行使朱亥奉璧一雙詣秦秦王怒使置亥於獸圈中亥瞋目視獸皆血濺於獸面獸不敢動

漢獸圈九苑圈一在未央宮中文帝問上林尉及馮媛當熊皆此處獸圈上有樓觀

橋

橫橋三輔舊事云秦造橫橋漢承秦制廣六丈三百八十

步置都水令以掌之號爲石柱橋漢末董卓燒之

渭橋秦始皇造渭橋重不能勝乃刻石作力士孟賁等像

祭之乃可動今石人在渭橋在長安北三里跨渭水爲橋

霸橋在長安東跨水作橋漢人送客至此橋折柳贈別王

莽時霸橋災數千人以水沃救不滅更霸橋爲長存橋

便門橋武帝建元二年初作此橋在便門外跨渭水通茂

陵長安城西門曰便門此橋與門對直因號便橋

飲馬橋在宣平城門外

陵墓

漢諸陵先總屬太常今各依其地界屬三輔

漢太上皇陵高帝葬太上皇於櫟陽北原因置萬年縣於櫟陽大城內以爲奉陵邑其陵在東者太上皇西者昭靈后也

高祖初居櫟陽故太上皇因在櫟陽本年太上皇崩葬北原

高祖長陵在渭水北去長安城三十五里按高祖本紀十二年四月甲辰崩于長樂宮五月葬長陵長陵山東西廣一百二十步高十三丈長陵城周七里百八十步因爲殿垣門四出及便殿掖庭諸官寺皆在中

呂后陵在高祖陵東按史記外戚世家高后合葬長陵注云漢帝后同塋則爲合葬不合陵也

惠帝安陵去長陵十里按本紀惠帝七年八月戊寅崩于未央宮葬安陵在長安城北三十五里安陵有果園鹿苑云

文帝霸陵在長安城東七十里因山爲藏不復起墳就其水名因以爲陵號

景帝陽陵在長安城東北四十五里按景帝五年作陽陵起邑陽陵山方百二十步高十丈

武帝茂陵在長安城西北八十里建元二年初置茂陵邑武帝作陵也本槐里縣之茂鄉故曰茂陵周回三里三輔舊事

云武帝於槐里茂鄉徙戶一萬六千置茂陵高一十四丈

一百步茂陵園有鶴觀戶一萬六千本
作六萬一千

昭帝平陵在長安西北七十里去茂陵十里帝初作壽陵
令流水而已石槨廣一丈二尺長二丈五尺無得起墳陵
東北作廡長三丈五步外爲小廚裁足祠祝萬年之後掃
地而祭

宣帝杜陵在長安城南帝在民間時好遊鄠杜閒故葬此
元帝渭陵在長安北五十六里

成帝延陵在扶風去長安六十二里

一曰成帝於霸陵北
步昌亭起壽陵卽武

帝之廢
陵也

王莽時遣使壞渭陵延陵園門冢愚曰毋使民復

思也又以墨色洿其周垣

哀帝義陵在扶風渭城西北原上去長安四十六里

平帝康陵在長安北六十里興平原口

文帝母薄姬南陵在霸陵南故曰南陵

即今所謂薄陵也

昭帝母趙婕妤雲陵在雲陽甘泉宮南今人呼爲女陵

李夫人墓東西五十步南北六十步高八丈在茂陵西北

一里俗名英陵亦云集仙臺

一日高二丈周同三百六十步

王莽妻死葬渭陵長壽園僞諡曰孝穆皇后僭號億年陵

舊本云億年陵王莽妻死諡曰孝穆皇后葬渭城長壽園西陵曰億年

雜錄

漢宮中謂之禁中謂宮中門閣有禁非侍衛通籍之臣不

得妄入

通籍謂記名於門通出入禁門也籍者為三尺竹牒記其年紀名字物色縣宮門案省相應乃得入

行道豹尾中亦視禁中

謂天子出行道中則有儀衛豹尾

至孝元皇后父

名禁避之改曰省中省察也言出入禁中皆當省察不可

妄也

鹵簿天子出車駕次第謂之鹵簿有大駕有法駕有小駕

大駕則公卿奉引大將軍參乘大僕御屬車八十一乘者

古

諸侯二車九乘秦滅六國兼其車服漢依秦制故大駕八十一乘屬者言相聯屬不絕也

作三行尚書

御史乘之備千乘萬騎出長安出祠天於甘泉備之百官

有其儀注名曰甘泉鹵簿法駕京兆尹奉引侍中參乘奉

車郎御屬車三十六乘北郊明堂則省副車小駕祠宗廟

用之

清道謂天子將出或有齋祠先令道路掃灑清淨

靜室天子出入警蹕舊典行幸所至必遣靜室令先按行

清淨殿中以虞非常

蔡邕獨斷曰天子所至曰幸幸者宜幸也世俗謂車駕所至臣民被其澤

以僥倖故曰幸也

離宮天子出遊之宮也

行在所天子以四海爲家不以京師宮室居處爲常則當

乘車輿以行天下

天子至尊臣下不敢溲瀆言之故託之於乘輿或謂之車駕

車輿所

至奏事皆曰行在

陛下陞所由陞堂也天子必有近臣執兵階陛以戒不虞

臣下與天子言不敢指斥天子故呼在殿陛下以告之故稱陛下因卑達尊之意也上書亦如之如羣臣士庶相與語曰閣下足下之屬

繭館漢宮闕疏云上林苑有繭館蓋蠶繭之所也蠶室行腐刑之所也司馬遷下蠶室

鐘室在長樂宮高祖縛韓信置鐘室中

作室上方工作之所

長安御溝謂之楊溝謂植高楊於其上也

闕觀也周置兩觀以表宮門其上可居登之可以遠觀故謂之觀人臣將朝至此則思其所闕

塾門外舍也臣來朝君至門外當就舍更熟詳所應對之事塾之言熟掖門在兩傍如人臂掖也闈闈宮中小門也

永巷永長也宮中之長巷幽閉宮女之有罪者武帝時改

為掖庭置獄焉列女傳周宣王姜后脫簪珥待罪永巷

蠻夷邸在長安城內藁街藁街街名蠻夷邸在此街若今鴻臚館

關中八水皆出入上林苑 霸水出藍田谷西北入渭

澹水亦出藍田谷北至霸陵入霸 涇水出安定涇陽笄

頭山東至陽陵入渭 渭水出隴西首陽縣烏鼠同穴山

東北至華陰入河 豐水出鄠南山豐谷北入渭 鎬水

在昆明池北 牢水出鄠縣西南入潦谷北流入渭 潘

水在杜陵從皇子陂西北流經昆明池入渭

三輔黃圖卷下終

跋

右三輔黃圖二卷明陳繼儒寶顏堂祕笈刊本也隋書經籍志載黃圖一卷記三輔宮觀陵廟明堂辟雍郊時等卽此書新唐藝文志亦曰一卷馬氏文獻通考則曰三卷陳振孫書錄解題曰按唐志一卷今分上下卷其漢魏叢書等編俱曰六卷此陳氏刊本作二卷或卽沿用書錄解題刊本亦未可知四庫全書提要仍作六卷蓋據通行本之卷數也是書爲無名氏撰不詳著自何人水經注引如淳漢書注屢稱三輔黃圖史記正義載如淳說漢書以黃圖爲據者尤不一而足而晉灼亦援黃圖以解漢書如淳爲

曹魏時陳郡丞晉灼亦晉初人是書之爲後漢人撰殆無疑義孫氏星衍另輯三輔黃圖本亦據劉昭郡國志注謂是漢末人所著斯可定作者時代矣至王氏玉海謂思子宮在湖萬歲宮在汾陰而此書皆隸甘泉宮與史不合王氏謨又謂棧陽宮下明著在今岐州扶風縣東北虢宮下明著在今岐州虢縣界扶風及虢皆唐時岐州屬因謂書爲唐人續增其實此書中如昭臺犬臺宮本在上林苑步壽宮本在役徂梁山宮本在好時甚至回中宮遠在隴西並皆屬於甘泉則在湖之思子宮在汾陰之萬歲宮亦何不可遙隸況甘泉宮去長安城三百里以在外之諸宮觀

統於在外之甘泉宮或其時有此制歟若棫陽宮虢宮下
言在今扶風虢縣則明屬注書者之語氣孫氏謂原書詞
甚簡後人既益以注解多引史漢及三輔故事三秦記宮
闕疏廟記等書傳鈔者又亂入本文其說是也四庫提要
稱所紀宮殿苑囿之制條分縷晰至爲詳備惟愛博嗜奇
不免爲白璧微瑕亦以其兼採西京雜記漢武故事洞冥
記拾遺記之故然如孫氏所云其繁蕪皆出後人增益要
豈撰書人本志哉好古之士分別觀之藉以資建設審規
摹期裨於用足矣他可勿論也漢魏本書首有目錄陳本
無之茲仍其舊民國二十三年三月校

長安宋聯奎

蒲城王健

江寧吳廷錫

